

Morning Dogri (NSD) National News Bulletin 14-06-2025

आकाशवाणी

- सरकार नै एयर इंडिया दे जहाज तबाह होने दे मामले दी पढ़ताल लेई उच्च स्तरी बहुआयामी कमेटी दा गठन कीता ऐ।
- ईरान नै इजराइल पर जवाबी हमले च मिसाइल ते ड्रोन हमला कीता ऐ। एहदे कोला पैहले इजराइल लै ईरान दे परमाणु ठकानें पर हमले कीते हे।
- केन्द्री मंत्री हरदीप सिंह पुरी होरें भरोसा दित्ता ऐ जे मुख्य च ईंधन दी लोड़चदी सप्लाई उपलब्ध ऐ। इजराइल—ईरान संघर्ष करी दुनिया च ईंधन दी कीमतें च बाढ़ा होआ ऐ।
- केई उत्तरी राज्यें च लूह चलने दी शैका ऐ। मौसम सरबन्धी मैहकमे नै राजस्थान च रैड अलर्ट जारी कीता ऐ। दक्खन समुंद्री कंडे आले इलाकें च भारी बरखा पौने दी पेशगोई कीती गई ऐ।
- भारत दी सुरुचि सिंह नै आईएसएसएफ विश्व कप च लगातार त्रीह बारी सुन्ने दा तगमा जित्तेआ ऐ।
- विश्व टैस्ट चैंपियनशिप च दक्खन अफ्रीका गी जित्त लेई छड़े 69 रंजें दी लोड़ ऐ।

<><><><><><>

Air India Crash

सरकारै वीरवारें अहमदाबाद थमां लंदन दे गैटविक ब्हाई अड्डे जा'रदे एयर इंडिया दे जहाज एआई—171 दे तबाह होने दी असल जांच दा पता लाने लेई इक उच्च स्तरीय बहु—आयामी कमेटी दा गठन कीता ऐ। इक सोशल मीडिया पोस्ट च सिविल हवाबाजी मंत्रालय नै गलाया ऐ जे कमेटी नेइएँ घटनाएं गी रोकने ते उंदे शा निबड़ने लेई जारी मजूदा नियम—कायदें ते दिशा निर्देशों दी जांच करोग, तां जे भविक्ख च नेइएँ घटनाएं थमां बचेआ जाई सकै।

<><><><><><>

AI Flight

अहमदाबाद च एयर इंडिया दे जहाज तबाह होने आले विनाशकारी हादसे च मरने आलें दी गिनतरी 254 पुज्जी गई ऐ। इस जहाज पर कल 242 यात्री सुआर हे जिंदे च 169 भारतीय नागरिक, 53 ब्रिटिश नागरिक, 7 पुर्तगाली नागरिक ते 1 कैंनेडा दा नागरिक ते जहाज अमले दे 12 जनें शामिल हे। इस हादसे च छड़ा इक जना जेहड़ा भारतीय मूल दा ब्रिटिश नागरिक हागै जींदा बची गेआ ऐ। भारतीय मैडिकल एसोसिएशन गुजरात दे अध्यक्ष मेहूल शाह होरें चरुं मैडिकल विद्यार्थिऐं ते इक डाक्टर दी घरै आली दी मौत दी तस्दीक कीती ऐ। रिहायशी इलाकें जित्थे जहाज तबाह होआ हा, 8 लोथें दी पंछान कीती गई ऐ ते लोथें गी परोआर आलें गी सौंपेआ गेआ ऐ। डीएनए दी जांच लेई 219 रिश्तेदारें दे खून दे नमूने लैते गे न ते सिविल अस्पताल च 31एं जनें दा इलाज चला करदा ऐ।

<><><><><><>

DGCA

सिविल हवाबाजी निदेशालय डीजीसी नै बहमदाबाद ब्हाई जहाज हादसे मगरा निवारक उपाएं दे रूपै च जेनएक्स इंजन कन्नै लैस बोइंग दे 787—8 ते 787—9 ड्रीमलाइनर जहाजे दे बाद्ध सुरक्षा निरीक्षण लेई एयर इंडिया गी निर्देश दित्ता ऐ। डीजीसीए नै गलाया ऐ जे सरबंधत क्षेत्रीय दफतरे दे कन्नै आपसी तालमेल बनाइयै फौरी तौरा पर निरीक्षण कीता जाना लोड़चदा। निदेशालय नै गलाया ऐ जे ब्हाई जहाज दे डोआरी भरने थमां पैहले इलैक्ट्रानिक इंजन नियंत्रण प्रणाली परीक्षण दी समीक्षा टेक ऑफ पैरामीटर दी परतियै जांच ते होर दूई लोड़चदी जांच होनी लाजमी ऐ। डीजीसीए नै दऊं हफते दे अंदर जांच करने ते पिछले 15एं दिनें च बार बार आई दी तकनीकी खराबिएं दी समीक्षा दे आधार उप्पर रखरखाव कारवाई तौले शा तौले मुक्कमल करने दे निर्देश दित्ते न। पुलस सूत्रें मूजब उस थाहरे थमां ब्लैक बाक्स बरामद कीता गेआ, एहदे शा पेहले उत्थुआं वायस रिकार्डर बी बरामद कीता गेआ हा।

<><><><><><>

Iran

ईरान नै शुक्रवारें रातीं इजराइल दे खलाफ जवाबी हमला कीता। जेहूदे च उनें इजराइली शैहरें पर सैंकड़ा मिसाइलां ते ड्रोन कन्नै हमला कीता जिसी तेहरान नै आपरेशन सावियर पुनिशमेंट नां दित्ता ऐ।

इस बड़्डे पैमाने उप्पर होई दी बम्बबारी नै पूरी इजराइल च ब्हाई हमले दे सायरन बजाई दित्ते ते नक्खें नागरिकें गी आसरमे च जाने लेई मजबूर करी दित्ता की जे इनें धमाकें च तेल अवीव ते यरूशलम गी हलाइयै रखी दित्ता। ईरान दे खलाफ अपने सब्बने शा महत्वपूर्ण सैन्य हमले दे किश गै घैंटे मगरा होआ, जेह्दे च परमाणु सुविधाएं गी नशाना बनाया गेआ ते वरिष्ठ सैन्य कमांडरें गी मारी दित्ता गेआ।

<><><><><><>

PM-Israel

इजराइल दे प्रधानमंत्री बेन्जामिन नेतान्याहू होरें प्रधानमंत्री नरेन्द्र मोदी हुंदे कन्नै पच्छम एशिया दी मजूदा स्थिति दे बारे च फोन पर जानकारी दित्ती। सोशल मीडिया पोस्ट उप्पर मोदी होरें गलाया जे उनें नेतान्याहू हुंदे कन्नै गल्लबात दरान क्षेत्रीय शांति ते स्थिरता दी फौरी तौर पर ब्हाली दी जरूरता उप्पर जोर दित्ता। इजराइल दे विदेश मंत्री होरें भारत दे विदेश मंत्री डॉ. एस. जयशंकर होरें गी फोन पर मजूदा स्थिति दे बारे च जानकार कीता।

<><><><><><>

Puri

केन्द्रीय पेट्रोलियम ते कुदरती गैस मंत्री हरदीप सिंह पुरी होरें गलाया ऐ जे देश च औने आली म्हीने लेई लोड़चदी ईधन सप्लाई मजूद ऐ। उनें कल पेट्रोलियम सचिव ते भारतीय ऊर्जा सार्वजनिक क्षेत्र दे उपक्रमें दे प्रमुखें कन्नै जायजा बैठक मगरा सोशल मीडिया पोस्ट च एह जानकारी दित्ती। मंत्री हुंदे आस्सेआ दित्ती गेदी एह जानकारी महत्वपूर्ण ऐ की जे कल ईरान उप्पर इजराइल हमले मगरा अंतर्राष्ट्रीय तेल दी कीमतें च बड़ा मता उछाल आया ऐ।

<><><><><><>

IMD

भारतीय मौसम विभाग नै राजस्थान लेई रैड अजर्ट जारी करदे होई गलाचया ऐ जे अगले 2—3 दिनें तगर इस क्षेत्र च अंधी झक्खड़ कन्ने बड़ी मती गर्मी पौग। विभाग नै जम्मू कश्मीर, हरियाणा, चंडीगढ़, दिल्ली, मध्यप्रदेश, पंजाब ते उत्तर प्रदेश च बी अज्ज बड़ी मती गर्मी पौने दा अनुमान ऐ।

<><><><><><>

World Blood Donar Day

अज्ज विश्व रक्तदाता दिवस मनाया जा'रदा ऐ। इस ब8रे दा विशे सारे ऐ "खून देओ, मेद देओ, किट्ठे रलियै अस जीवन बचाचे"। एह कार्यक्रम सुरक्षत खून दी लोड़ दे बारे च जागरूकता बधाने ते आपूँ अपनी मर्जी कन्नै, मुफ्त रक्तदान आले रक्तदाताएं गी उंदे जीवन रक्षक खून दे तोहफे आस्तै धन्नबाद करने दा कम्म करदा ऐ।

<><><><><><>

Ayush Yoga

11में अंतर्राष्ट्रीय योग दिवस शा पैहले आयुष मंत्रालय अज्ज नमीं दिलली च हाईब्रिड वैश्विक शिखर सम्मेलन—योग कनेक्ट दा सरिस्ता करा करदा ऐ। सम्मेलन च बहरीन, अमरीका, बरतानिया ते दक्खन कोरिया सनें बक्ख—बक्ख देसें दे इक ज्हार शा बद्ध योग करने आले लोक शामिल होआ करदे न। इस दरान आईडीवाई दे दाहके भर दे प्रभाव पर योग प्रभाव रिपोर्ट दा विमोचन बी कीता जाग।

<><><><><><>

Shooting

भारतीय नशानेबाज सुरुचि सिंह नै जर्मनी दी म्यूनिय च आईएसएसएफ विश्व कप च महिलाएं दे 10 मीटर एयर पिस्टल मकाबले दे फाइनल च सुन्ने दा तगमा जित्तेआ ऐ। सुरुचि नै कल फ्रांस दी कैमिली जेडे जेबस्की गी 0—2 कन्नै हराई दित्ता। ची नदी याहू किक्सन नै 221.7 प्वाइंटे कन्नै कैह दा तगमा जित्तेआ। आईएसएसएफ विश्व कप दे 10 मीटर एयर पिस्टल मकाबले च सुरुचि नै एी लगातार त्रिया सुन्ने दा तगमा जित्तेआ ऐ।

<><><><><><>

WTC

दक्खन अफ्रीका विश्व टैस्ट चेंपियनशिन 2025 च जित्त हासल करने दे नेड़े पुज्जी गेआ ऐ। जित्त लेई दक्खन अफ्रीका दी टीम गी छड़े 69 रंज दी लोड़ ऐ ते ओहूदे कोल 8 विकेटां मजूद न। आस्ट्रेलिया दे खलाफ 282 रंजें दे लक्ष्य दा पिछा करदे होई दऊं खडारिएं दे आउट होने पर 213 रंज बनाई लैते दे न।

<><><><><><>

